

Mir hän dr Schuldig

Mir läbe in ere gottlose Wält
Wo nyt so regiert wie Despote und Gäld
Jede duet uff s aige Wohl fokussiere
Und nyt isch so schlimm wie sich sälber z blamiere
Egal was bassiert, egal wär was sait
Scho isch dr usgstreggti Zaigfinger bereit
Und dytet hysterisch mit wenig Geduld
Uff dr Erschtbescht und maint: *Lueg, dä dert isch schuld!*

Bisch friehner im Gundeli – z'mitzt in dr Nacht
Im Auti mit Vollgas in e Mischtkibel gracht
Hesch dr Drägg zämme gwischt, machsch e Zeedeli dra
Und d Nochberschaft het ihri Fraid do dra gha

Wenn bim Giovanni Spaghetti-Blausch isch
Und s spritzt dr dr Sugo quer ibere Disch
E Volldräffer uff em Vreni sym Gloid
Saisch numme: *E Guete, das duet mir jetz laid*

Hesch Eerger im Gschäft und dr Chef isch e Dubel
Dr Lohn isch au schlächt und zahlt wird in Rubel
Denn merggsch die Bude isch numme zum Schämme
Paggsch dini Sache: *y hau s jetz – und zämme!*

Dr Nochber isch au e fertigs Kamuff
Macht jede Dag Party – dä reggt my denn uff
Y glopff an sy Dire mit em e Wy unterem Arm
E kurzi Erklärig – scho underliggt er mym Charme

Doch hit isch s kompläxer und nyt me bim Alte
Es wimmlet vo Jurischte und andere Gstalte
Jede wott Rächt ha und ebbis verdiene
Vernifftigi Leesige findet me niene
Derzue kemme egomani Struggture
Vo de Staatschefs bis zue de Buure
Kaine entschuldigt sich – *s duet mir jo laid*
Oder isch fir e Kompromiss gar bereit

Dr Japankäfer sait zem Zägg:
Du darfsch blybe, ych muess wägg
Und lueg my nit so dimmlich aa
Dr Trueb isch schliesslig schuld do dra.

Uff Basel kunnt dr ESC
So vyl Volgg kasch sälte gseh
No schlimmer als e Demo
Und schuld elai isch Nemo.

Dr Putin sait: *Wolodimir,*
d Ukraine hol y mir.
Und lueg my bitte nit so a,
schuld elai bisch Du do dra.

Dr Assad maint: *y ch ha Eych gfange,*
mitgehange, mitgehange.
Und lueged my doch nit so a,
schuld elai sin Ihr do dra.

Dr Scholz sait ganz verbitteret:
Die Ample isch jetz gschyteret.
Lueged my doch nit so a,
schuld sin anderi do dra.

Au de Zircher isch es z vyl
Und dr Böögg muess ins Exil
Dert klappt s nit rächt, er fällt uff d Schnuure
Uns fraits e bitzli naimedure
Lueg jetz nur d Misere aa
Und schuldig isch dr Böögg do dra.

So isch es hit e zächi Sach
Eb Amateur, eb ain vom Fach
E jede wott sich durestiere
Rächt ha und sich nit blamiere
Wott Gäld verdiene, anderi kneeble
Sich in die erschi Reihe heeble
Und egal, was au bassiert
Dr Finger isch positioniert
Zaigt uff dr Näggscht mit Ungeduld:
Dä dert isch an allem schuld!

**D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Mäntig znacht bis am Mittwoch demoorge!
Deert und an de Verkaufsständ (CINS) in dr Stadt ka
men au alli Zeedel und Schnitzelbängg, d Blaggede
und dr Rädäbäng kaufe.**

**Am Frytig, 14. Meerz und Samschtig, 15. Meerz 2025 findet uf em Barfi
die 1. Lektion statt. Fasnacht für alli zum Kennelehre und Usprobiere!
jetzt-fasnacht.ch**

**D Zeedellääsede isch am Sunntig noo dr Fasnacht 2025, am 16. Meerz,
vom Finfi bis am Siibeni zoobe, in dr Baseldytschi Bihni (im Lohnhof 4).
D Foyer-Bar isch vom Vieri ewägg offe.**

Queryystyyger bi de Querschleeger jederzyt willkomme!